

SPR di kawal kerajaan, kata Ambiga
Malaysian Insider
Sept 22 , 2013
OLEH MOHD FARHAN DARWIS

Pengerusi Bersama Bersih Datuk Ambiga Sreenevasan berkata Suruhanjaya Pilihan Raya (SPR) bertindak di bawah kuasa Putrajaya, sedangkan badan berkenaan sepatutnya bertindak sebagai sebuah badan bebas.

Ambiga ketika memberi keterangan sebagai saksi terakhir Tribunal Rakyat di Subang Jaya hari ini menegaskan, badan pengendali pilihan raya itu juga mengambil pendirian partisan ketika mengeluarkan kenyataan.

"SPR umpama bertindak atas arahan Putrajaya ... saya ada masalah dengan suruhanjaya yang tidak menerangkan dengan jelas setiap isu yang berlaku.

"Mereka tidak berbuat apa-apa apabila wujud isu berkaitan pilihan raya," kata pemimpin gabungan 84 badan bukan kerajaan itu kepada panel.

Antara isu yang dibangkitkan Ambiga adalah masalah Daftar Pemilih yang tidak selari dengan data Jabatan Pendaftaran Negara (JPN), dakwat kekal yang tidak kekal, isu pengundi hantu dan sebagainya.

"SPR seharusnya menasihati Putrajaya, bukan menurut arahan kerajaan," kata Ambiga.

"Mereka perlu menjadi badan yang betul-betul bebas memandangkan mereka menguruskan pemilihan antara parti politik yang akan menjadi kerajaan," katanya lagi.

Selain itu, sikap pemimpin SPR seperti Timbalan Pengerusi Datuk Wan Ahmad Wan Omar juga turut dipersoalkan tribunal memandangkan kenyataan beliau yang sering mengkritik pembangkang.

"Tangan mereka (SPR) umpama terikat," kata Ambiga.

Salah seorang panel, Prof Madya Dr Mavis Puthuchery bagaimanapun mencelah, dan menuntut agar tribunal berkenaan fokus kepada penambahbaikan struktur SPR, dan bukan hanya melihat kepada kelemahan anggotanya.

"Saya percaya SPR berat kepada mana-mana parti kerana kerajaan telah memerintah sangat lama.

"Tapi peranan kita bukan untuk mengkritik SPR tetapi memperbaiki sistem. Mungkin tangan mereka terikat," katanya, yang juga merupakan bekas pensyarah di Fakulti Ekonomi dan Pentadbiran Universiti Malaya.

Ambiga merupakan saksi terakhir hari ini sejak tribunal bermula pada 18 September lalu.

Selain beliau, bekas ahli Parlimen Kuala Selangor Dr Dzulkefly Ahmad turut memberi keterangan kepada Tribunal Rakyat hari ini.

Ambiga bagaimanapun berkata dalam keterangannya merujuk kepada peruntukan Perlembagaan, jawatan tertinggi SPR bagaimanapun sukar untuk ditukar kerana mereka

dilantik oleh Yang DiPertuan Agong, dan mempunyai kuasa seumpama hakim.

Turut kelihatan sepanjang Tribunal Rakyat berlangsung adalah Pengerusi Bersama Bersih Datuk A Samad Said. – 22 September, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/spr-di-kawal-kerajaan-kata-ambiga>